

傷寒雜病論會通

傷寒雜病論

會通

己丑孟春

張果齋題

時年八旬
有二



中華民國三十八年
歲次己丑正月初六
日至五月二十五日
中南山人書於樊川
樂素洞時年六十四

傷寒雜病論會通序

天人性命之學。後儒論之詳矣。顧其說多倚於理。而罕重視
夫氣。抑豈知理氣之相需。無斯須可輕重者。理固所以宰氣。
而氣實所以載理。氣之通塞。理之存亡。繫焉。疾病災患。櫻其
軀。若無以調劑其血氣。氣之餒。未有不因之墮落者。此神農
黃帝以來。醫藥之事所由興。至漢張氏仲景實集其大成。後
世尊之為醫聖。蓋深明理氣之相依。為性命。而夫人之道。乃
全也。自漢迄今。斯道遞行。其以著述名者。無慮百數十家。然
皆不越醫聖之軌範。而卒鮮得其真傳。其裨益於性命之故。
有仁心者尤多。貽憾。斯則吾友竹齋黃君之不能已於研窮
也。君陝西長安人。幼貧失學。其尊人素業破工。君少習其業。

暇輒從人問字。久之識天算地輿。旁求儒術。又以深窺洛閩。撰有周易會通五紀衍義。修曆芻言。皇極經世考證等書。然其精神專注。最有意趣者。厥惟醫道。其於醫道探討無厭者。厥惟仲景之書。癸酉之冬。君已修訂仲景傷寒雜病論集註三度矣。此心終有未慊。迺詣南陽謁醫聖祠墓。竊冀繼承其遺業。次年甲戌冬。復往寧波訪求仲景遺書。因周君岐隱得識桂林羅哲初先生。示之以其師左修之所授仲景十二稿傷寒雜病論十六卷。驚歎無已。因得手鈔一通。夫此書之流傳。自晉王叔和僅為第七次稿。歷代所宗。別無攷見。不意越千百年。忽發現寫本。至十二稿。得非君之精誠貫注。上通醫聖之靈所感召乎。顧此書在醫聖既精益求精。則君之虛懷

求益愈不能以前所修訂者為止境矣。由是取今世通行宋
刊傷寒金匱各書及近湖南劉崑湘得於江西張隱君之古
本。涪陵劉鎔經得於墊江某洞石櫃之古本。相校深見此稿
條理精密。有非後世所能及。由是綜核前三度採集各註。參
以中外醫書新發明者。撰註仲景十二稿傷寒雜病論會通
計十八卷。而請序於余。藉以諗前聖之至仁。而箴後人之躁
妄也。因憶十年前。余有幽鬱之疾。腹患癥結。卧牀旬餘日。幾
瀕於危。延君自省菴興。為鍼期門巨闕。差然立解。腹內顯有
聲鳴。迺遂即起牀。同君步行原野省墓。往返十餘里。迄無倦
容。君之術何其神。而余之病永不作矣。今君獨不自足。研求
彌篤。則此後活人之術當更有進。將使醫林中千萬人奉為

至臬傳之後世庶不至庸醫殺人之不悟矣。昔孔子讀易至
韋編三絕復撰十翼而後易道大明。仲景之書君苦心求得
晚本三復箋註必期至於會通而後醫道無誤。天地之大德
曰生。余雖不文奚容諉辭而不彰君之高誼哉。

中華民國三十八年歲在己丑正月下浣興平趙玉璽惕菴
敬識時年七十有五

題辭本文原為鍼灸經穴圖攷而作今以其有闕於本書發見之經過故移列於此

關中多名醫和緩與扁鵲思邈稱真人龍宮探秘鑰
闡寂忽千載奇才久不作偉哉黃夫子胸有匡時略
窮經淪道源篤行修天爵象緯辨星辰性理通伊洛
更以變理功殫心問醫藥手定長沙文六經為註脚
兩目如電光塵垢為之廓去年風雪中獨走南陽郭
瞻拜仲聖祠殘碑自摸索幾經兵火餘墓道委叢薄
慷慨謀重修天聲振木鐸今年來浙東觀書天一閣
邂逅得相遇風懷喜開拓世人競名利公獨安淡泊
公有一編書毫芒分經絡金鍼度世人絕技不輕祕
上溯靈樞經證引至詳博旁參重譯文他山資攻錯

腦後能下鍼，見者皆驚愕。轉笑銅人圖，窳陋成糟粕。
殺青聞有期，投贈得金諾。索我題一辭，鄙陋心自作。
翰墨合有緣，風雅非敢託。純學僅根荇，風雨今正惡。
誰能融古今，大力鼓鑪索。良醫比良相，天下同憂樂。
立言期千秋，莫謂書生弱。長安近日邊，三峯天外削。
別後積相思，索居苦寂寞。高蹤不可攀，青天飛一鶴。

甲戌臘八日鄞周利川岐隱拜稿

傷寒雜病論刊本序

民國二十二年癸酉冬，余三次修訂傷寒雜病論集註脫稿。迺詣南陽謁醫聖祠墓，獲馮應鰲於明崇禎元年訪仲景墓未見所鑄之靈應碑。清順治十年馮氏訓葉再至南陽募疏庀工，表墓建祠，求前碑不得，以為已毀。今距崇禎癸酉，仲景墓發見之歲，適五週甲子，碑乃復出，殆有數存焉。余旋之南京，備員中央國醫館編審。甲戌冬至，至鄞觀仲景佚書於天一閣，未得。因周君岐隱得識桂林羅君哲初，示余以其師左修之所授仲景十二稿傷寒雜病論十六卷。明年春羅君來京，與余同事。迺克手鈔一通，謹按仲景傷寒雜病論十六卷原書遭兵燹散佚不全，賴晉太醫令王叔和搜撫遺文，篇次為

三十六卷。永嘉亂後，中原板蕩，亦復失傳。其要方為江南諸師所秘，以孫思邈之殷勤述古，撰千金方，祇載仲景雜病方。晚年方獲傷寒論，收入翼方。天寶中，王燾撰外臺秘要，引仲景傷寒論，註出卷數至第十八。與梁七錄、隋唐志所列仲景書目卷數各殊。今世通行仲景傷寒論十卷，金匱要略方論三卷，金匱玉函經八卷。迺宋治平中，林億等奉勅校刻，而金成無已傷寒論註，堅字文皆作鞭，前人斷為隋時定本。元趙以德金匱玉函經行義，實為金匱要略變名。明清兩朝註傷寒金匱者數十家，大抵皆以林校及成趙二書為藍本。茲取十二稿本，與今世通行之宋刊傷寒金匱各書，及近年湖南劉崑湘得於江西張隱君之古本，涪陵劉鎔經得於墊江某

洞石櫃之古本相校。如太陽篇下傷寒脈浮滑飲家本及活
古本同作此以表有熱裏有寒白虎湯主之。脈方非違義實
難通。相古本作表有熱裏無寒似較優勝。然猶未若十二稿
作裏有熱表無寒之確切不易也。其餘訂正諸本脫訛者不
遑枚舉。而列黃疸宿食下利吐逆嘔噦寒疝消渴等證於陽
明少陰厥陰諸篇深契以六經鈐百病之微旨。若平脈法雜
病證治各篇條理精密有非後世所能及。或疑醫聖撰論何
至易稿十三次。殊不思醫學著述動關民命。仲景救濟之心
求精固無已時。昔朱子註四書。稿經七易。病革時尚命門人
改訂大學誠意章數句。凡諸學理愈研愈微。豈一成即不可
再易乎。又疑張紹祖自稱為仲景四十六世孫之時代。與人

類之發育大率百年可行五代未能脗合。據羅君述其師左
修之。民國十一年壬戌七十八歲始歸道山。隨父嶺南受書
張紹祖時年弱冠。當清同治三年。上距漢獻帝建安十年。一
千六百六十年。考通鑑宋仁宗至和二年三月丙子詔封孔
子後四十七世孫孔宗愿襲封文宣公為衍聖公。上距周敬
王四十一年孔子卒。一千五百三十四年。比例張氏尚少孔
氏一世多一百二十六年。人類生率世次安可以常數限哉。
洎國難作。南京陷。羅君返桂。途遭匪劫。十二稿副本幸存。余
家軍事參議院副院長張公伯英。前任總指揮駐節南陽時。曾
發願重修醫聖祠。設立國醫學校。未幾後防第果。今見此十
二稿本。歎為奇緣。欣然捐貲付梓。藏板南陽醫聖祠。由是久

湮人間之秘籍。得以流通。醫聖濟世之真傳。賴其不墜。千餘年承訛襲謬之刊本。有所訂正。裨益醫林。實匪淺鮮。爰序其顛末。考辨如右。中華民國二十八年孟春長安黃維翰敬識於西安中醫救濟醫院。

傷寒雜病論原序

余聞吾師張紹祖先生之言曰。吾家傷寒一書。相傳共有一十三稿。每成一稿。傳抄殆徧城邑。茲所存者。為第十二稿。餘者或為族人所秘。或付劫灰。不外是矣。叔和所得。相傳為第七次稿。與吾所藏者較。其間闕如固多。編次亦不相類。或為叔和所纂亂。或疑為宋人所增刪。聚訟紛如。各執其說。然攷晉時尚無刊本。猶是傳抄。唐末宋初。始易傳抄為刊刻。遂稱

易簡以此言之。則坊間所刊者不但非漢時之原稿。恐亦非叔和之原稿也。余聆訓之下。始亦疑之。及讀至傷寒例一卷。見其於可汗不可汗。可吐不可吐。可下不可下。法盡在其中。於六經已具之條文。並不重引。法律謹嚴。始知坊間所刻之辨可汗不可汗。可吐不可吐。可下不可下。以及發汗吐下後各卷。蓋後人以讀書之法。錯雜其間。而未計及編書之法。固不如是也。不然孔氏之徒。問仁者衆。問政者繁。何不各類其類。而憚煩若此耶。吾師諱學正。自言為仲氏四十六世孫。自晉以後。遷徙不一。其高祖復初公。自嶺南復遷原籍。寄居光州。遂聚族焉。吾師雖承家學。不以醫名。亦不輕出此書以示人。余之得受業者。殆有天焉。余宿好方術。得鍼灸之學於永

川鄧師憲章公。後隨侍先嚴遊宦嶺南。與吾師同寅。朝夕相
過從。見余手執宋本傷寒論。笑問曰。亦嗜此乎。時余年僅弱
冠。答曰。非敢云嗜。尚未得其要領。正尋繹耳。師曰。子既好學。
復知鍼灸。可以讀傷寒論矣。吾有世傳抄本傷寒雜病論十
六卷。向不示人。得人。不傳。恐成墜緒。遂歷言此書顛末。及吾
師家世。滔滔不倦。先嚴促余曰。速下拜。於是即席拜之。得師
事焉。今羅生哲初。為吾邑知名之士。從習鍼灸。歷有年所。頗
能好余之所好。余亦以所得者。盡授之。余不負吾師。羅生亦
必不負余。故特序其原起。羅生其誌之。羅生其勉之。光緒二
十年歲次甲午春三月桂林左盛德序

左修之先生像傳

此文原載於醫聖張仲景傳後。茲附錄於此像俟世
平製版再登

先生諱盛德，廣西桂林人也。年十五，即食廩膳。中歲酷嗜醫學，好遊名山大川，所遇輒多奇士。於永川遇鄧公憲章，得鍼灸學。於嶺南遇仲聖四十六世孫張公紹祖，得其家藏第十二次傷寒雜病論十六卷原稿，極深研幾，終不欲以醫名世。晚年歸隱，廣授生徒，經史而外，獨不及醫。雖有請益，俱不輕授。民十一年壬戌，壽七十有八，始歸道山。哲初忝列門牆，謬膺贊許。然東西南北，陸氏莊荒，琴劍飄零，不能光大其學，負吾師矣。茲擬將傷寒雜病論原稿付梓，公之天下，而以吾師遺像列於篇端，故略叙其顛末，俾後之君子得知此書之所從來，並得仰先生之丰采焉。中華民國二十四年孟夏桂林

羅哲初謹識於南京中央國醫館編審委員會